



二十一都懷古詩

~18
2757

^ 18
2456



光緒丁丑補鐫

三都懷古詩

明 18
冊 2456
卷

4m
2357

二十一都懷古詩目錄

三都懷古詩

檀君朝鮮一首

秦封一首

箕子朝鮮二首

高麗九首

衛滿朝鮮二首

韓一首

濊一首

貊一首

高句麗五首

報德一首

沸流一首

百濟 四首

彌鄒忽 一首

新羅 六首

溟州 一首

金官 一首

大伽倻 一首

甘文 一首

于山 一首

耽羅 一首

後百濟 一首

憶戊戌年間寓居鐘崗老屋三楹筆硯與刀尺雜陳以是為苦多坐小圃之旁萱棚菁花逢蝶悠揚雖炊烟屢絕意氣自若時閱東國地誌得一首輒苦吟彌日稚子童婢皆聞而誦之可知其用心不淺也是歲懋官次修入燕手抄一本寄潘香祖庶常及見潘書大加嗟賞以為兼竹枝詠史宮詞諸體之勝必傳之作李墨莊為題一絕祝編修另求一本異地同聲差可為樂傳不傳不須論也已亥以後供奉內閣被

聖主恩十年七遷官俸祿足以資衣食堂宇足以置筆硯顧職務倥偬不喜作詩有作皆率易而成非復疇昔

之苦吟公退之暇見此卷為兒輩所讀不覺悵然題之
如此乙巳仲秋古芸居士

余此卷庚戌秋攜至燕中紀曉嵐尚書最好古贈之羅
兩峯云欲寄鮑以文續刻知不足齋叢書中力求無以
應兩峯頗怏怏次修再入燕見兩峯案頭置一本烏絲
欄書字畫精妙知從曉嵐處借鈔也中國之士嗜書如
此余篋中復無副本茫然不知舊註之如何考訂前史
再為箋釋亦自笑其癖也壬子仲春又題

二十一都懷古詩

儒州 柳得恭惠風 撰

完山 李德懋懋官 訂

檀君朝鮮

東國通鑑東方初無君長有神人降于檀木下
立為君是為檀君國號朝鮮唐堯戊辰歲也三
國遺事檀君都平壤

大同江水浸烟蕪王儉春城似畫圖萬里塗山來執玉
佳兒尚憶解扶婁

大同江輿地勝覽大同江在平壤府東一里一名沮

江又名王城江其源有二一出寧遠郡加幕洞一出陽德縣文音山至江東縣界合流為西津江至府城東為大同江西流為九津弱水至龍岡縣東出急水門入海

王儉城三國史平壤者本仙人王儉之宅也東史檀君名王儉輿地勝覽燕人衛滿都王險險一作儉即平壤

塗山執玉東史夏禹十八年會諸侯於塗山檀君遣子扶婁朝焉文獻備考檀君子解扶婁為扶餘始祖箕子朝鮮

史記武王既克殷乃封箕子於朝鮮而不臣也漢書殷道衰箕子去之朝鮮教其民以禮義田蠶織作樂浪朝鮮民犯禁八條相殺以當時償殺相傷以穀償相盜者男没入為其家奴女子為婢欲自贖者人五十萬東國通鑑殷太師箕子紂諸父也紂無道箕子被髮佯狂為奴周武王伐紂訪道于箕子箕子為陳洪範九疇武王封于朝鮮都平壤

兔山山色碧森沈翁巾裾艸露侵猶似龍年奔卉寇松風閒作管絃音

兔山輿地勝覽箕子墓在平壤府城北兔山

翁仲巾裾董越朝鮮賦東有箕祠禮設木主題曰朝鮮後代始祖蓋尊檀君為其建邦啓土宐以箕子為其繼世傳緒也墓在兔山維城乾隅有兩翁仲如唐巾裾點以爛斑之苔蘚如衣錦繡之文襦

管絃音文獻備考壬辰之亂倭掘箕子墓左邊一丈許樂聲自壙中出懼而止

鹿眼籬斜井字阡一邨桑柘望芊芊誰知遼海蒼茫外耕種殷人七十田

殷人七十田平壤府志箕子井田在正陽含毬二門

外區畫宛然

衛滿朝鮮

史記朝鮮王滿者故燕人也燕王盧縮反入匈奴滿亡命聚黨千餘人魍結蠻夷服而東走出塞渡浪水居秦故空地上下障稍役屬真番朝鮮蠻夷及燕齊亡命者王之都王險索隱曰滿姓衛應劭云遼東有險瀆縣朝鮮王舊都臣瓚云險城在樂浪郡浪水之東也括地志云平壤城本漢樂浪郡王險城

魍結人來漢祖年同時差擬趙龍川箕王可恨無分別

填補梟雄博士員

博士魏畧箕子之後朝鮮王否子準立燕人衛滿詣準降準信寵之拜為博士賜以圭封之百里令守西邊滿誘亡黨眾稍多乃詐遣人告準言漢兵十道至求入宿衛遂還攻準準與滿戰不敵也

樂浪城外水悠悠誰識菽苴漢代侯不及當年津吏婦
箜篌一曲豔千秋

樂浪漢書朝鮮王滿傳子至孫右渠所誘漢亡人滋多未嘗入見終不肯奉詔天子遣樓船將軍楊僕左將軍荀彘擊定朝鮮為真番臨屯樂浪玄菟四郡文

獻備考樂浪郡治朝鮮縣今平壤

菽苴史記朝鮮相韓陰亡降漢封為菽苴侯

津吏婦古樂府琴操九引箜篌引亦曰公無渡河朝鮮津吏霍里子高妻麗玉所作子高晨起刺船見一白首狂夫被髮攜壺亂流而渡其妻隨呼止之不及遂溺歿妻乃援箜篌而歌曰公無渡河公終渡河公墜而歿將奈公何聲音悽愴曲終亦投河而歿子高還以其事語麗玉麗玉傷之乃引箜篌以寫其聲

韓

後漢書韓有三種一曰馬韓二曰辰韓三曰弁

韓馬韓在西有五十四國其北與樂浪南與倭
接箕子後四十餘世朝鮮侯準自稱王燕人衛
滿擊破準而自王準乃將其餘衆數千人走入
海攻馬韓破之自立爲韓王東國通鑑箕準既
爲衛滿所攻奪入海居韓地金馬郡文獻備考
金馬今益山郡有金馬山輿地勝覽箕準城在
益山郡龍華山上周三千九百尺

當年在信漢亾人麥秀殷墟又一春可笑蒼黃浮海日
船頭猶載善花嬪

善花嬪三國志朝鮮侯準既僭號稱王爲燕亾人衛

滿所攻奪將其左右宮人走入海居韓地東史箕準
號武康王輿地勝覽龍華山在郡北八里世傳武康
王旣得人心立國馬韓與善花夫人遊山下又云雙
陵在五金寺西數百步後朝鮮武康王及妃陵也

濊

漢書武帝元朔元年歲君南閩等口二十八萬
人降爲滄海郡後漢書濊北與高句麗沃沮南
與辰韓接東窮大海西至樂浪本朝鮮之地也
賈耽古今郡國志新羅北界溟州古濊國文獻
備考今江陵府東有濊時所等古城遺址

大關嶺外大東洋藥國山川陰搏桑野老不知興廢事
田間閉拾古銅章

大關嶺輿地勝覽大關嶺在江陵府西四十五里州
之鎮山也自女直之長白山縱橫迤邐據東海之濱
者不知其幾而此嶺最高金員外克巳詩秋霜鴈未
過時落曉日鷄初鳴處生

藥國輿地勝覽江陵府本濊國一云鐵國一云藥國
古銅章三國史新羅南解次次雄十六年北溟人耕
田得濊王印獻之

貊

漢書武帝卽位彭吳穿濊貊朝鮮後漢書遼東
太守祭彤威讐北方聲行海表於是濊貊倭韓
萬里朝獻又云句麗王宮與濊貊寇玄菟攻華
麗城文獻備考貊國都在今春川府北十三里

昭陽江北

昭陽江水接滄津通道碑殘沒棘榛東史未窮班掾志
堯時君命漢時臣

昭陽江輿地勝覽昭陽江在春川府北六里源出麟
蹄之瑞和縣與府之基麟縣水合流至楊口縣南為
艸沙里灘又至府東北為青淵為舟淵為狄巖灘為

昭陽江

通道碑東史檀君命彭吳治國內山川以奠民居本紀通覽牛首州有彭吳碑文獻備考彭吳乃漢人而非檀君之臣也金梅月堂時習詩通道自彭吳

高句麗

魏書高句麗者出於夫餘自言先祖朱蒙朱蒙母河伯女夫餘王閉於室中爲日所照引身避之日影又逐有孕生一卵大如五升以物裹之置於暎處有一男破殼而出及長字之曰朱蒙其俗言朱蒙者善射也夫餘之臣謀殺之朱蒙

乃與烏引烏違等二人棄夫餘東南走遇大水欲濟無梁夫餘人追之急朱蒙告水曰我日子河伯外孫今日逃走追兵垂及如何得濟於是魚鼈並浮成橋朱蒙得渡魚鼈乃解追騎不得渡朱蒙遂至普述水遇見三人其一人着麻衣一人着衲衣一人着水藻衣與朱蒙至訖升骨城居焉號曰高句麗因以高爲氏三國史高句麗始祖東明聖王姓高氏自夫餘至卒本川觀其山河險固欲都焉結廬於沸流水上時年二十歲漢元帝建昭二年也琉璃王二十年遷

都於國內築慰那巖城山上王十三年移都於
丸都東川王二十一年築平壤城移民及廟社
通典高句麗自東晉以後居平壤

弧矢橫行十九年麒麟寶馬去朝天千秋霸氣涼于水
墓裏消沈白玉鞭

麒麟寶馬輿地勝覽麒麟窟在平壤府九梯宮內浮
碧樓下東明王養麒麟馬于此世傳王乘麒麟馬入
此窟從地中出朝天石升天其馬跡至今在石上也
朝天石在麒麟窟南

白玉鞭輿地勝覽東明王墓在中和府龍山俗號眞

珠墓世傳高句麗始祖常乘麒麟馬奏事天上年至
四十遂昇天不返太子以所遺玉鞭葬於龍山

昔日夫餘挾彈兒東明王子號琉璃數聲黃鳥啼深樹
猶似禾姬罵雉姬

挾彈兒三國史琉璃王諱類利初朱蒙在夫餘娶禮
氏女有娠朱蒙歸後乃生子是爲類利幼年出遊陌
上彈雀誤破汲水婦人瓦器婦人罵曰此兒無父故
頑如此類利慙歸問母我父何人今在何處母曰汝
父非常人不見容於國逃歸南地開國稱王類利乃
與屋智句鄒都祖等三人行至卒本見父王立爲太

子

黃鳥三國史琉璃王娶二女一曰禾姬鶻川人之女也一曰雉姬漢人之女也二女爭寵王於涼谷造東西二宮各置之後王田於箕山禾姬罵雉姬曰汝漢家婢妾何無禮之甚乎雉姬慙恨亡歸王聞之策馬追之雉姬怒不還王嘗息樹下見黃鳥飛集乃感而歌曰翩翩黃鳥雌雄相依念我之獨誰其與歸

鷄立山前漲戰塵丹旌依戀沁園春平生慷慨愚溫達自是龍鍾可笑人

鷄立山輿地勝覽鷄立山在聞慶縣北二十里俗號

麻骨山以方言相似也

愚溫達三國史溫達容貌龍鍾可笑家貧乞食以養母破衫弊履往來市井間時人目為愚溫達平崗王少女好啼王戲曰汝常啼我且長必不得為士大夫妻當歸之愚溫達及女年二八欲下嫁於上部高氏公主曰大土常語必為溫達之妻何故改前言乎王怒曰宜從汝所適於是公主以寶釧數十繫肘後出宮歸溫達後周武帝伐遼東王逆戰於肄山之野溫達為先鋒疾鬪論功第一王嘉歎曰吾婿也備禮迎之賜爵大兄及陽崗王即位溫達請伐新羅王許

懷古詩
之溫達臨行誓百鷄立峴竹嶺以兩不歸於我則不
返也遂與羅人戰中流矢死欲葬柩不肯動公王撫
棺曰死生汝矣嗚呼歸矣遂舉以寔

遼海歸旂數片紅湯湯漚水捲沙蟲乙支文德真才士
倡五言詩冠大東

漚水輿地勝覽清川江一名漚水源自妙香山經安
州城北又西流三十里與博川江合流入海

乙支文德三國史乙支文德沈鷲有智隋開皇中煬
帝下詔征高句麗左翊衛大將軍宇文述出夫餘道
右翊衛大將軍于仲文出樂浪道與九軍至鴨綠水

文德見隋軍士有饑色欲疲之每戰輒北隋軍一日
七捷東濟漚水去平壤城三十里因山為營文德遣
使詐降於述述等為方陣而還文德出軍四面抄擊
至漚水隋軍半濟文德擊其後軍殺右屯衛將軍辛
世雄諸軍俱潰奔還一日一夜至鴨綠九軍初渡遼
三十萬五千人還至遼東城惟二千七百人

倡五言詩隋書遼東之役于仲文率軍指樂浪道至
鴨綠水高麗將乙支文德詐降仲文將執之尙書右
丞劉士龍固止之遂捨文德尋悔遣人給文德曰更
有言議可復來也文德不從遂濟仲文選騎渡水每

戰破賊文德遺仲文詩曰神策究天文妙籌窮地理
戰勝功既高知足願云止

句麗錯料下句麗駐蹕山青老六師為問西京紅拂妓
虬髯客是莫離支

下句麗後漢書王莽更名高句麗王為下句麗侯尤
侗外國竹枝詞高句麗降下句麗

駐蹕山唐書太宗自將伐高麗次安市北部倭薩高
延壽南部倭薩高惠真等舉眾降帝因號所幸山為
駐蹕山勒石紀功攻安市未能下城中見帝旌麾輒
乘陴噪帝怒江夏王道宗以樹枚裹土積之迫城不

數丈果毅都尉傅伏愛守之自高而排其城城且頽
伏愛私去所部虜兵得自頽城出據而塹斷之積火
縈盾固守帝斬伏愛有詔班師酋長登城拜謝帝嘉
其守賜絹百匹

莫離支唐書蓋蘇文者或號蓋金姓泉氏自云生水
中以惑眾為莫離支專國猶唐兵部尚書中書令職
云貌魁秀美鬚髯冠服皆飾以金佩五刀左右莫敢
仰視使貴人伏諸地踐以乘馬出入陳兵長呼禁切
行人畏竄至投坑谷海東稗乘虬髯客傳雖唐人傳
奇亦必有其人也按夫餘之地為高氏所統在隋唐

懷古詩
之際更無所謂夫餘國南蠻所奏海船千艘甲兵十
萬人夫餘國云云似指高句麗為夫餘也意者蓋蘇
文以東部大人之子意氣傑驍乘隋季之亂遊歷中
國將有為也及見文皇異表器氣東返稱兵作亂做
得莫離支爾

報德

唐書乾封元年征高麗以李勣為遼東道行軍
大總管兼安撫大使三年圍平壤執王臧部其
地為都督府者九州四十二縣百復置安東都
護府總章二年大長鉗牟岑率眾叛立臧外孫

安舜為王三國史新羅文武王十年高句麗水
臨城人牟岑大兄自窮年城行至西海史冶島
見高句麗大臣淵淨土子安勝迎致漢城中奉
以為君遣小兄多式等告曰興滅國繼絕世天
下之公義也惟大國是望王處之國西金馬渚
封安勝為高句麗王十四年改封為報德王以
王妹妻之神文王二年徵為蘇判賜姓金氏興
地勝覽益山郡本馬韓國百濟並之號金馬渚
春草萋萋金馬渚句麗南渡有荒城未知欲報誰家德
可惜英風劍大兄

懷古詩
劔大兄三國史高句麗劔牟岑欲興復國家叛唐立
王外孫安舜為王又云牟岑大兄收合殘民至涇江
南殺唐官唐書總章二年詔高侃李謹行為行軍總
管討安舜舜殺牟岑走新羅

沸流

遼史地理志正州本沸流王故地國為公孫康
所並渤海置沸流郡有沸流水三國史高句麗
始祖二年沸流國王松讓來降以其地為多勿
都封松讓為主麗語謂復舊土為多勿輿地勝
覽成川府本沸流王松讓故都

劔撓青峰一十二遊車衣水逝湯湯朱蒙不是真豪傑
欺負酸寒喫菜王

劔撓青峰輿地勝覽紇骨山在成川府西北二里有
攢峰十二朴元亨詩江上羣峰劔撓尖峰前江水正
接藍

遊車衣水輿地勝覽沸流江即卒本川俗稱遊車衣
津在成川府西三十步其源有二一出陽德縣吳江
山一出孟山縣大母院洞至府北合流歷紇骨山山
有四石穴水入穴中沸騰而出故名沸流江又與慈
山郡禹家淵合流入大同江

喫菜王三國史高句麗東明王見沸流水有菜葉逐
流下知有人在上流者因以獵徃尋至沸流國其國
王松讓出見曰寡人僻在海隅未嘗得見君子今日
相遇不亦幸乎然不識吾子自何而來答曰我是天
帝子來都於某所松讓曰我累世爲王地小不足容
兩主君立都日淺爲我附庸可乎王忿其言與之射
以校藝松讓不能抗古記東明王與沸流王松讓較
射松讓以畫鹿置百步內不能中其臍朱蒙以玉指
環懸於百步之外破如瓦解松讓大驚欲以立都先
後爲附庸朱蒙造宮室以朽木爲柱故如千歲松讓

不敢爭

百濟

南史馬韓百濟一國，濟卽其一也後漸強
大兼諸小國，史百濟之國蓋馬韓之屬也初
以百家濟因號百濟其都曰居拔城亦曰固麻
城三國史百濟始祖溫祚王都河南慰禮城以
十臣爲輔翼國號十濟漢成帝鴻嘉三年也後
以百姓樂從改號百濟其世系與高句麗同出
扶餘故以扶餘爲氏溫祚王十三年就漢山下
立柵十四年遷都蓋婁王五年築北漢山城近

省古王二十六年移都漢山文周王元年移都
熊津聖王十六年移都泗泚國號南扶餘文獻
備考百濟所夫里郡一云泗泚今扶餘縣

歌樓舞殿向江開半月城頭月影來紅毯
君王愛在自溫臺

半月城異地勝寬餘縣半月城石等周一萬三千
六尺即言百濟都城也抱扶蘇山而等如頭抵日馬
江形如半月

自溫臺輿地勝覽自溫臺在扶餘縣西五里自落花
巖順流而西有巖跨水渚可坐十餘人俗傳百濟王

遊于此巖則巖自溫

落日扶蘇數點烽天寒白馬怒濤洶奈何不用成忠策
却恃江中護國龍

扶蘇輿地勝覽扶蘇山在扶餘縣北三里東岑曰迎
月臺西岑曰送月臺

成忠三國史百濟義慈王十六年佐平成忠上書曰
臣觀時察變必有兵革之事若異國兵來陸路不使
過沈峴水軍不使入岐伐浦據險以禦然後可也王
不省及唐兵乘勝迫城王歎曰悔不用成忠之言
護國龍輿地勝覽扶蘇山下有巖跨江上有龍攫跡

俗傳蘇定方伐百濟臨江欲渡風雨大作以白馬爲餌釣得一龍須臾聞霽遂渡師故江名白馬巖名釣龍臺

雨冷風淒去國愁巖花落盡水悠悠泉臺寂寞誰相伴同是江南歸命侯

巖花輿地勝覽落花巖在扶餘縣北一里俗傳義慈王爲唐兵所敗宮女奔迸登是巖自墜于江故名歸命侯唐書顯慶五年詔左衛大將軍蘇定方爲神邱道行軍大摠管討百濟自城山濟海百濟守熊津口定方縱擊大破乘潮以進拔其城執義慈送京師

平其國置熊津馬韓東明金漣德安五都督府義慈痛歎贈衛尉卿許舊臣赴臨詔葬孫皓陳叔寶墓左浴槃零落浣臙脂石室藏書事可疑時見荒原秋艸裏行人駐馬讀唐碑

浴槃扶餘縣志縣庭有石槃夜衙或燃松明炬於其上焦黑剝缺隱隱有蓮花刻紋傳爲百濟宮女浴槃石室藏書扶餘縣志縣之豐田驛東有石壁喚立圻痕如戶號冊巖傳爲百濟時藏書處舊有好事者欲斲開晴日大雷懼而止云

唐碑扶餘縣志縣南二里有石塔刻云大唐平百濟

國碑顯慶五年歲在庚申八月十五日癸未建陵州
長史判兵曹賀遂亮撰洛州河南權懷素書蓋蘇定
方紀功之辭也文體駢儷筆法遒勁當為海東古碑
第一縣北三里又有劉仁願紀功碑中折字多刻

彌鄒忽

三國史朱蒙自北扶餘逃難至卒本扶餘扶餘
王以女妻之扶餘王薨朱蒙嗣位生二子長曰
沸流次曰溫祚及朱蒙在北扶餘所生子來為
太子沸流溫祚恐為太子所不容遂與烏干馬
黎等十臣南行百姓從之者多至漢山登負兒

岳望可居之地沸流欲居海濱十臣諫曰惟此
河南之地北帶漢水東據高岳南望沃澤西阻
大海作都於斯不亦空乎沸流不聽分其民歸
彌鄒忽以居之溫祚都河南慰禮城沸流以彌
鄒土濕水鹹不得安居歸見慰禮都邑鼎定人
民安泰遂慚悔而歿輿地志今仁川府南十里
海坪上有大冢墻垣舊址宛然石人偃仆而甚
大俗傳彌鄒王墓云

湏上悲歌別弟兄登山臨水汨南征三韓地劣姜肱被
休等崢嶸惠念城

志忿城輿地志今仁川府南有山名南山一名文鶴山山上有城世傳沸流所都以王志忿而歿故名志忿城

新羅

北史新羅者其先本辰韓種也地在高麗東南居漢時樂浪地其王本百濟人自海逃入新羅遂王其國三國史新羅始祖姓朴氏諱赫居世漢宣帝五鳳元年四月丙辰即位號居西干時年十三先是朝鮮遺民分居山谷間為六村是為辰韓六部高墟村長蘇伐公望楊山麓蘿井

菊林間有馬跪而嘶徃觀之忽不見馬只有大卵部之有嬰兒出焉収而養之及年十餘歲岐嶷然夙成六部人以其生神異推尊之至是立以為君辰人謂瓠為朴以大卵如瓠故以朴為姓居西干辰言王也文獻備考新羅國號徐耶伐或云斯羅或云斯盧東京雜記慶州本新羅古都

辰韓六部澹秋烟徐苑繁華想可憐萬萬波波加號笛橫吹三姓一千年

辰韓六部三國史一曰闕川楊山村二曰突山高墟

村三日紫山珍支村四日茂山大樹村五日金山加
利村六日明活山高耶村是為辰韓六部

徐菟支獻備考新羅國號徐耶伐後人稱九京都曰
徐伐轉為徐菟

萬萬波波東京雜記神文王時東海中有小山隨波
徃來王異之泛海入其山上有竹一竿命作笛吹之
兵退病愈旱雨雨晴風定波平號萬波波息笛歷代傳
寶之至孝昭王加號萬萬波波息笛

三姓三國史新羅始祖姓朴氏脫解尼斯今姓管氏
味鄒尼斯今姓金氏芝峰類說新羅享國幾二千年

統合三韓時和歲豐號稱新羅聖代

幾處青山幾佛幢菴池鴈鴨不成雙春風谷口松花屋
時聽寥寥短尾猿

荒池鴈鴨輿地勝覽鴈鴨池在慶州府天柱寺北新
羅文武王鑿池積石為山象巫山十二峯種花卉養
珍禽其西有臨海殿舊址

松花屋東京雜記新羅金履信宗女財買夫人歿葬
青淵上谷因名財買谷每春日同宗士女會宴於谷
之南湖于時百卉敷榮松花滿谷架菴於谷口名松
花房

短尾獲東京雜記慶州北方虛缺故狗多短尾謂之
東京狗

料峭風中過上元怵怵怵怵踏歌喧年年糲飯無人祭
一陣寒鴉噪別村

怵怵怵怵輿地勝覽書出池在慶州府金鰲山東新
羅炤智王十年正月十五日王幸天泉寺有烏鼠之
異王令騎士追烏南至避村兩猪相鬪留連見之失
烏所在有老翁自池中出奉書題云開見二人死不
開一人死馳獻于王王曰與其二人死莫若勿開一
人死耳日官奏云二人者庶人也一人者王也王然

之開見書中云射琴匣王入宮見琴匣射之乃內殿
焚修僧與宮主潛通謀逆也宮主與僧伏誅名其池
曰書出池又云王既免琴匣之禍國人以為若非烏
鼠龍馬猪之功則王之身憾矣遂以正月上子辰
上午上亥等日忌百事不敢動作為慎日俚言怵怵
謂悲愁而禁忌也又以十六日為烏忌日以糲飯祭
之國俗至今猶然佔俚齋集怵怵歌怵怵復怵怵大
家幾不保流蘇帳裏玄鶴倒揚且之哲難偕老
金鰲山色晚蒼蒼渲染雞林一半霜萬疊伽椰人去後
至今紅葉上書莊

金鰲山輿地勝覽金鰲山一名南山在慶州府南六里唐顧雲贈崔致遠詩我聞海上三金鰲金鰲頭戴山高高山之上今珠宮貝闕黃金殿山之下今千里萬里之洪濤

雞林三國史脫解尼斯今九年春三月王聞金城西始林樹間有雞鳴聲遣瓠公視之金色小櫝掛樹枝白雞鳴其下瓠公還以告王使人取櫝開之有小男兒在其中姿容奇偉王喜曰此豈非天遺我令胤乎收養之及長聰明多智乃名闕智以其出於金櫝姓金氏改始林名雞林因以爲國號

伽椰輿地勝覽伽椰山在陝川郡北三十里一名牛頭山

上書莊三國史崔致遠字孤雲或云海雲沙梁部人年十二隨便舶入唐乾符元年神武郎裴瓚下及第調漂水縣尉考績爲承務郎侍御史內供奉賜紫金魚袋黃巢叛高駢爲諸道行營公馬都統以討之辟致遠爲從事光啓元年將詔書來聘留爲侍讀兼翰林學士出爲太山太守自西事大唐東歸故國皆遭亂世無復仕意挈家而隱伽椰山解印寺偃仰終老輿地勝覽上書莊在金鰲山北高麗太祖之興崔

致遠知必受命上書有雞林黃葉鶴嶺青松之語後人名其所居曰上書莊

城南城北蔚藍峯落日昌林寺裏鍾明補東京書畫傳金生碑版率居松

金生三國史金生自幼能書平生不攻他藝年踰八十猶操筆不休隸書行艸皆入神崇寧中學士洪灌隨進奉使人宋館於汴京翰林待詔楊球李革奉勅至館書圖簇灌以金生行艸一卷視之二人大駭曰不圖今日得見右軍手書灌曰此乃新羅人金生書也二人不信之趙子昂昌林寺碑跋云右唐新羅僧

金生所書其國昌林寺碑字畫深有典型雖唐人名刻無以遠過之也古人云何地不生才信然輿地勝覽昌林寺在金鰲山今廢有古碑無字

率居三國史率居善畫嘗於黃龍寺壁畫老松體幹鱗皴鳥窠徃徃望之飛入及到蹭蹬而落歲久色暗寺僧以丹青補之鳥窠不復至又慶州芬皇寺觀音晉州斷俗寺維摩像皆其筆也

三月初旬去踏青蚊川花柳鎖冥冥流觴曲水傷心事休上春風鮑石亭

蚊川輿地勝覽蚊川在慶州府南五里史等川下流

也高麗金克已有蚊川祓禊詩

鮑石亭輿地勝覽鮑石亭在慶州府南七里金鰲山
西麓鍊石作鮑魚形故名流觴曲水遺跡宛然三國
史甄萱碎入新羅王都時王與夫人嬪御出遊鮑石
亭置酒娛樂賊至狼狽不知所為侍從臣僚及宮女
伶官皆陷沒

溟州

三國史新羅宣德王夢無子羣臣議欲立族子
周元周元宅京北二十里會大雨闕川漲不得
渡或曰天其或者不欲立周元乎今大上等敬

信前王之弟德望素高有人君之體於是衆議
翕然立之既而雨止國人皆呼萬歲輿地志周
元懼禍退居溟州不朝請後二年封周元為溟
州郡王割溟州翼嶺三陟斤乙於蔚珍等地為
食邑文獻備考溟州今江陵府

雞林眞骨大王親九雉分供左海濱最憶如花池上女
魚書遠寄倦遊人

眞骨三國史新羅斯多含系出眞骨又薛鬪頭言新
羅用人論骨品令狐澄新羅國記其國王謂之第一
骨餘貴族謂之第二骨

九雉文獻備考新羅之制王日飯米三斗雄雉九首
魚書遠寄高麗史樂志高句麗俗樂部有溟州曲世
傳書生遊學至溟州見一良家女美姿色頗知書生
每以詩挑之女曰婦人不安從人待生擢第父母有
命則事可諧矣生卽歸京師習舉業女家將納婿女
平日臨池養魚魚聞警咳聲必來就食女食魚謂曰
吾養汝久空知我意將帛書投之有一大魚跳躍含
書悠然而逝生在京師一日爲父母具饌市魚而歸
剝之得帛書驚異卽持帛書及父書徑詣女家婿已
及門矣生以書示女家遂歌此曲女父母異之曰此

精誠所感非人力所能爲也遣其婿而納生焉驢界
志新羅王弟無月郎二子長曰周元次曰敬信母溟
州人始居蓮花峯下號蓮花夫人及周元封於溟州
夫人養於周元溟州曲卽蓮花夫人事書生指無月
郎也且溟州乃新羅時置非高句麗時名則溟州曲
當屬新羅樂

金官

南齊書加羅國三韓種也建元元年國王荷知
使來獻授輔國將軍本國王北史新羅附庸於
迦羅國三國史註伽倻或云加羅駕洛國記後

懷古詩
漢光武建武十八年三月駕洛九干禊飲水濱
望見龜旨峯有異氣就見紫繩繫金盒而下開
盒有金色六卯奉置之翼日六卯剖為六童子
日就岐疑十餘日身長九尺衆奉一人為主卽
首露王也生于金盒因姓金氏國號伽倻乃新
羅儒理王十八年也餘五人為五伽倻主東以
黃山江西南以海西北以智異山東以伽倻山
為境輿地勝覽五伽倻高靈為大伽倻固城為
小伽倻星州為碧珍伽倻咸安為阿那伽倻咸
昌為古寧伽倻又云龜旨峯在金海府北三里

首露王宮遺址在府內輿地志首露王墓在金
海府西三百步墓旁有廟龜旨山東有王妃墓
府人並祭以正五八月芝峯類說壬辰倭賊發
首露王墓頭骨大如銅盆柩旁有二女顏色如
生出置壙外卽銷文獻備考駕洛或作伽落又
稱伽倻後改為金官

訪古伽倻咽竹枝婆娑塔影虎溪濬回看落日沈西海
正似紅旗入浦時

訪古伽倻鄭圃隱夢周金海鷺子樓詩訪古伽倻艸
色春興上幾度海為塵

婆娑塔輿地勝覽婆娑石塔在虎溪上凡五層其色
赤斑彫鏤甚竒世傳許后自西域來時船中載此塔
以鎮風濤

虎溪輿地勝覽虎溪在金海府城中源出益山南流
入江倉浦

紅旗入浦駕洛國記東漢建武二十四年許皇后自
阿踰陀國渡海而至望見緋帆茜旗自海西南隅而
指北首露王於宮西設幔殿候之王后維舟登陸憇
於高嶠解所着綾袴質于山靈及至王迎入幔殿越
二日同輦還闕立以為后國人號初來維舟處曰主

浦解綾袴處曰綾峴茜旗入海處曰旗出邊輿地勝
覽許皇后或云南天竺國王女姓許名黃玉號普州
太后

大伽椰

三國史真興王二十三年命異斯夫討伽椰多
斯舍為副領五千騎馳入梅檀門立白旗城中
恐懼不知所為異斯夫引兵臨之一時盡降輿
地志大伽椰今高靈縣縣南一里有宮闕遺址
又有石井號御井文獻備考大伽椰始祖伊珍
阿鼓王至道設智王凡十六世

千載高山流水音泠泠一十二絃琴淒涼往事無人問
紅葉迎霜作錦林

一十二絃琴輿地勝覽伽倻國嘉悉王樂師于勒象
中國秦箏而制琴號伽倻琴高靈縣北三里地名琴
谷世傳勒率工人肄琴處芝峯類說伽倻國王制十
二絃琴今所謂伽倻琴即是

錦林輿地勝覽高靈縣西二里有古藏俗稱錦林王
陵

甘文

三國史新羅助賁尼斯今二年以伊飡于老為

大將軍討破甘文國以其地為郡輿地志甘文

今開寧縣也甘文山在縣北二里又柳山在縣

東二里柳山北甘文國遺址尚存

獐姬一去野花香埋沒殘碑古孝王三十雄兵曾大發

蝸牛角上鬪千場

獐姬輿地勝覽獐陵在開寧縣西熊峴俗稱甘文國

獐夫人陵

孝王輿地勝覽開寧縣北二十里有大家俗傳甘文

金孝王陵

三十兵東史甘文國大發兵三十文獻備考甘文蓋

國之至小者也

于山

三國史新羅智證麻立干十三年于山國歸服
歲以土宜為貢于山國在溟州正東海島或名
鬱陵島輿地勝覽鬱陵島一云武陵又云羽陵
在蔚珍縣正東海中地方百里土地饒沃竹大
如杠鼠大如猫桃核大如升

春風五兩邏帆迴海上桃花寂寞開唯見可之登岸卧
更無獅子撲人來

邏帆文獻備考鬱陵島產柴胡藁本石楠藤艸諸香

木蘆竹多合抱者蘆實桃核大可為杯升 本朝刷
出逃民空其地每三年一送人審視官給斧子十五
伐其竹若木又采土物納于朝以為信三陟營將越
松萬戶相遞入焉

可之文獻備考鬱陵島海中有獸牛形赤眸無角羣
卧海岸見人獨行害之遇人多走入水名可之
獅子三國史異斯夫為阿瑟那軍主謀并于山國謂
其國人愚悍可以計服乃多造木獅子載戰船抵其
國告曰汝若不服放此獸踏殺之其人恐懼而降

耽羅

北史百濟南海行有耽牟羅國土多獐鹿附庸
於百濟唐書龍朔初有儋羅者其王儒理都羅
遣使入朝國居新羅武州南島上俗朴陋衣大
豕皮夏革屋冬窟室初附百濟後附新羅耽羅
國記厥初有三神人從地湧出曰良乙那曰高
乙那曰夫乙那三乙那遊獵荒僻皮衣肉食一
日見紅帶紫衣人函載青衣處女三及駒犢五
穀種浮海而至曰我是日本國使也吾王生此
三女云西海中降神子三人將開國而無匹故
送此三女也三那以歲次分娶之播五穀牧駒

犢日就繁庶良乙那所居曰第一都高乙那所
居曰第二都夫乙那所居曰第三都高乙那十
二代孫高厚高淸昆弟三人造舟渡海泊于耽
津新羅盛時也于時客星見南方太史奏異國
人來朝之象也及厚等至王嘉之稱厚曰星主
以其動星象也令淸出袴下愛如已子稱曰王
子又號其季曰都內國號耽羅以來泊耽津朝
新羅也各賜寶蓋衣帶而遣之自此事新羅遂
以高爲星主良爲王子夫爲都上後改良爲梁
輿地勝覽濟州本耽羅國或稱毛羅又耽牟羅

三乙那城瘴霧開耽津江口峭帆迴厥初還有毛興穴
何必他人誇下來

耽津文獻備考今康津縣新羅耽津

毛興穴輿地勝覽濟州牧鎮山北麓有穴曰毛興穴
卽三乙那湧出處也

後百濟

三國史甄萱尚州加恩縣人也體貌雄奇志氣
倜儻從軍赴西南海防以勞爲裨將新羅眞聖
王六年羣盜蜂起萱嘯聚徒侶擊京西南州縣
所至響應遂襲武珍州都完山自稱後百濟王

遣使入後唐稱藩唐策授檢校太尉兼侍中判
百濟軍事持節都督全武公等州軍事行全州
刺史海東四面都統指揮兵馬制置等事百濟
王食邑二千五百戶輿地勝覽古土城在全州
府北五里甄萱所築

徃事悠悠疽背翁續紛紅葉古城東可憐探釁金山寺
亾國何關絕影驄

疽背翁三國史甄萱有子十餘人第四子金剛身長
而多智萱慶之欲傳位其兄神劔幽萱於金山佛宇
殺金剛自稱大王萱與季男能父女哀福嬖妾姑比

懷古言
二十一
等逃奔高麗高麗太祖待以厚禮尊為尚父萱發疽
卒於黃山佛舍

續紛紅葉鄭圃隱夢周全州萬景樓詩青山隱約扶
餘國紅葉續紛百濟城

絕影驄高麗史甄萱獻絕影島驄馬于太祖後聞讖
云絕影名馬至百濟亾乃悔之使人請還太祖笑而
許之

秦封

通鑑唐天祐初高麗石窟寺眇僧躬又聚眾據
開州稱王號秦封國後梁貞明中遣佐良尉金

立奇入貢于吳三國史弓裔新羅人考憲安王
或云景文王之子祝髮為僧號善宗軒輊有膽
氣羅季君盜蜂起善宗投北原賊梁吉軍中吉
委任分兵使東略地遂擊破猪足牲川夫若金
城鐵原等城天復元年稱王國號摩震年號武
泰移青州人戶一千入鐵圓城為京改武泰為
聖冊元年分定溟西十三鎮朱梁乾化元年改
聖冊為水德萬歲改國號為秦封自稱彌勒佛
頭戴金幘身被方袍以長子為青光菩薩季子
為神光菩薩出則騎白馬以綵飾其鬃尾使童

男女奉幡蓋香火前導又命比邱二百餘人梵
唄隨後輿地勝覽楓川原弓裔所都在鐵原府
北二十里宮殿遺址宛然

烏鵲飛邊認故宮淒涼霸業黑金東設弧猶記端陽節
未作雞林老薛公

烏鵲鄭松江澈關東別曲弓王故闕烏鵲啾啾千古
興亡知不知不

黑金東高麗史唐商客王昌瑾忽於市中見一人狀
貌瓌偉鬚髮皓白左手持三椀右手擎一古鏡方一
尺許謂昌瑾曰能買我鏡乎昌瑾以二斗米買之鏡

主將米沿路散與乞兒而去疾如旋風昌瑾懸其鏡
於市壁日光斜映隱隱有細字可讀其文曰三水中
四維下上帝降子於辰馬先操雞後搏鴨此謂運滿
一三甲暗登天明理地遇子年中興大事混蹤跡沌
姓名混沌誰知慎與聖振法雷揮神電於己年中二
龍見一則藏身青木中一則現影黑金東智者見愚
者皆興雲注雨與人征或見盛或視衰盛衰為滅惡
塵滓此一龍子三四遞代相承六甲子此四維定滅
丑越海來降須待酉此文著見於明王國泰人安帝
永昌吾之記凡一百四十七字昌瑾初不知有文及

見之謂非常戲于齋齋令昌瑾物色求其人彌月不能得唯東州勃颯寺熾盛光如來像前有填星古像如其狀左右亦持椀鏡昌瑾喜具以狀白齋歎異之令文人宋含弘白卓許原等解之含弘等曰辰馬者辰韓馬韓也青木松也謂松岳郡也黑金鐵也今所都鐵圓也今主初盛於此終滅於此乎先操雞後搏鴨者王侍中御國之後先得雞林後收鴨綠之意也三人相謂曰王猜忌嗜殺若告以實王侍中必遇害吾輩亦且不免矣乃詭辭告之

設弧端陽三國史弓裔以五月五日生而有齒憲安王惡之勅令殺之使者取楛櫛中投樓下乳婢竊捧手觸眇一目

高麗

五代史後唐明宗長興三年高麗權知國事王建遣使者來明宗乃拜建玄菟州都督充大義軍使封高麗國王高麗史太祖神聖大王姓王氏諱建字若天松岳郡人新羅政衰弓裔據高句麗之地都鐵原國號泰封授太祖精騎大監著功累階為波珍祭兼侍中深貞明四年騎將洪儒裴玄慶申崇謙卜智謙等密謀推戴國號

高麗改元天授二年定都于松岳之陽文獻備
考開城府古高麗國都

荒涼二十八王陵風雨年年暗漆燈進鳳山中紅躑躅
春來猶自發層層

二十八王陵文獻備考高麗太祖以下二十八陵在
開城府松岳進鳳山碧串洞鳳鳴山諸處

進鳳躑躅輿地勝覽進鳳山在開城府東南九里杜
鵲花盛開世稱進鳳躑躅

鳳輦逶遲降帝姬春寒瓊帳祓羊脂浮生白眼應難較
紅淚先沾勺藥枝

帝姬高麗史忠烈王后齊國大長公主名忽都魯揭
里迷失元世祖女也元宗十五年忠烈王以世子在
元尚公主

祓羊脂高麗史忠烈王嗣位與公主東還同輦入京
父老相慶帝令脫忽送公主脫忽先至張穹廬祓以
白羊脂

白眼高麗史公主生子貞和官主宴賀行酒王顧見
公主公主曰何白眼視我耶豈以官主跪於我乎遂
命罷宴下殿大哭

勺藥枝高麗史忠烈王二十二年五月壽寧官勺藥

盛開公主命折一枝把玩良久感泣得疾薨年三十
九

結識中朝趙子昂風流都尉瀋陽王教人提舉征東省
留醉蘆溝萬卷堂

瀋陽王元史高麗王暉子諱襲王位成宗初年尚寶
塔寶憐公主十一年進爵瀋陽王

征東省元史至元二十年立征東行中書省於高麗
萬卷堂高麗史忠宣王諱璋古諱諤蒙古諱益智禮

普化知元宿衛凡十年佐仁宗定內亂迎立武宗以
大尉留燕邸構萬卷堂書史自娛姚燧閣復元明善

趙孟頫咸遊王門

銀燭如星照禁扃題詩多上牡丹亭如今破瓦嵩山在
不復三呼繞殿青

牡丹亭李相國集山呼亭牡丹盛開賦者多至百人
輿地勝覽山呼亭在延慶宮內

嵩山輿地勝覽松岳在開城府北五里初名扶蘇又
稱鵠嶺又松山又神嵩

三呼繞殿高麗史忠宣王時松岳夜鳴王怪而問之
陳無作對曰無傷也古詩有嵩岳三呼繞殿青之句

王悅

指點前朝宰相家廢園風雨土墻斜牡丹孔雀凋零盡
黃蝶雙雙飛菜花

牡丹孔雀高麗史神宗初參知政事車若松與特進
竒洪壽同入中書省若松問於洪壽曰孔雀好在于
答曰食魚鯁咽而死因問養牡丹之術若松具道之
聞者譏之

潮落潮生急水門年年商船到江村攢峯十二巫山似
只少三聲隨淚猿

急水門宋史禮成江居兩山間束以石碕湍激而下
所謂急水門最險狹大明一統志急水門在開城南

海中死如巫峽

商舶高麗史宋商集禮成江

天壽南門春暮時丹樓碧閣影參差風簷雨笠何村客
終日沈吟看鷓鴣

天壽輿地勝覽天壽院在城東卽天壽寺古址

看鷓鴣高麗史康日用欲賦鷓鴣每冒雨至天壽寺
溪南而看之

紫霞洞裡草菲菲不見宮姬并馬歸爲是辛王行樂地
至今猶有燕雙飛

紫霞洞輿地勝覽紫霞洞在松岳山下洞府幽阻溪

水清漣最為絕勝

辛王明史高麗王顓無子以寵臣辛耽之子禍為子

高麗史辛禍小字牟尼奴耽婢妾般若之出也

燕雙飛高麗史辛禍使妓燕雙飛佩弓吹笛衣綉龍

衣並轡而行

可憐青木未藏龍蕭瑟千年鵠嶺松鐵犬寥寥東向吠

白雲飛盡見三峯

鐵犬松京雜記世傳神僧道詵為麗祖定都松岳之

陽既而雲捲東南見漢陽三角山律兀天際跌足歎

咄鑄鐵犬十二使吠之蓋以三角為松岳之窺峯云

今府東有坐犬里

二十一都懷古詩終

